



# KOPI PAHIT

Di dalam pertabalan di Brunei adat istiadat dikawal dengan rapi. Telah diumumkan bahawa dalam majlis pertabalan sultan tidak ada seorang perempuan pun yang ada di majlis itu. Di dalam pertabalan sultanah tidak ada lelaki di majlis itu, dikecualikan sultan yang akan memahkotakan sultanah. Disyukuri benar adat dan agama masih dikawal bukan seperti ... ya seperti apa ... tahu sama tahu lah!

\* \* \*

Dalam adat istiadat orang baik-baik dan raja-raja Melayu tentunya janggal benar membenarkan anak isteri menari dengan orang lain. Tetapi zaman yang dikatakan moden kalau ada isteri yang tidak mahu menari atau tidak mahu berdansa-dansi dengan orang lain, dianggap sudah ditinggalkan zaman kononnya. Kalau rakyat biasa membuat lumayan juga, tetapi kalau tidak berkecuali, tentu orang berasa jengkel. Habis bagaimana? Kerana orang dewasa dan orang besar buat bagaimana? Jawabnya: "Pemuda atau tua zaman sekarang tak boleh ditegur tak boleh dilarang" – nafsu-nafsilah!

Ada pepatah orang tua-tua bilang "Tua-tua keladi, makin tua makin jadi". Maksudnya tentu umum mengetahui bahawa pekerjaan gatal dan miang dilakukan terus oleh orang-orang tua begitu, tentunya mereka sudah lupa, bahawa mereka hampir mati – pintu taubat hampir tertutup – buat amal kebajikan masanya sudah sedikit – kubur kata mari rumah kata pergi dan awak kata nanti, kalau ruh dah dicabut dari badan, baru mengenal Allah – masa itu semuanya tidak berguna. Taubatlah manusia – taubatlah – ingat-ingatlah akan hukum Allah!

\* \* \*

Tuan Haji Ali Munawar telah menafikan yang beliau ada pemah menyatakan kepada "wanita-wanita Islam negeri ini supaya membuka auratnya ... umpamanya membuang tudung, memakai baju yang menaikkan berahi. Apa yang ditegaskannya," katanya "ialah supaya dada wanita itu diisi dengan iman." Ini adalah penafiannya daripada sebuah tulisan yang mengatakan beliau ada berkata perempuan yang

bertudung itu ortodoks. Kalau begitu *al-hamdu 'Lah* – beliau tidak menentang ayat 31 *Sūrah al-Nūr* itu.

\* \* \*

Ahli-ahli perniagaan Melayu ada ura-ura mahu hantar rombongan perniagaan ke Rusia. Bagus, buat berkenal-kenalan dan makan angin, tetapi buat bermiaga menjadi pertanyaan, kerana perniagaan Melayu masih kecil dan masih banyak yang baharu nak belajar bermiaga dan belum sampai kepada nisbah yang besar-besar. Kalau ada pun hanya jadi *director-director company* yang dipunyai beramai-ramai – oleh siapa? entahlah ... ada nama sudahlah!

\* \* \*

Hari Pemuda telah sempurna diraikan pada 31 Julai dan perayaan berjalan dengan meriah. Pemuda-pemuda yang terbanyaknya mengambil bahagian pemuda Melayu yang beragama Islam. Waktu Mawlid al-Nabī mereka beramai-ramai menyambut Mawlid dan kemudian waktu beradu cantik dan berdansa-dansi mereka juga yang digalakkan. Jadi semuanya boleh. Apakah hukum Tuhan antara batil dan hak itu boleh dicampur-adukkan? Jagalah kebinasaan dan keruntuhan yang mencampurkan antara hak dan batil.

- Cemeti al-Faruq.